

PODER DI TRAHADO

Janilsa Offerman ganadó Kantadó Krioyo Hubenil



Janilsa Offerman a resultá ganadó Kanto Krioyo Hubenil 2023. Ku e komposishon Rincon den gloria di Tico Ba-
lentien e hóben a sa di lanta públiko presente i al final bai ku e premio máksimo. Un bon públiko a animá i sostené
e 8 partisipantenan. Di parti BONERIANO pabien na tur ku a kai den premio.

EZAir ta
hiba otro
piloto korte

PAG 5



www cityshopbonaire.com
f City Shop Bonaire
+599 700.6442
+599 717.3666

City Shop
Smart shopping • Better living

MANTENE BO
VEHIKULO OF
EKIPO DEN
KONDISHON
KU PIESANAN
KUMPRÁ NA NAPA



xerox™

OBERSI
ELECTRONICS
BONAIRE

Skol di verano durante Semana Santa

KRALENDIJK -- Stichting Lezen en Schrijven Bonaire ta organisá atrobe un skol di verano durante Semana Santa pa grupo ocho di skol básiko. E skol di verano ta kuminsá djalu na 10 di april i ta dura te

djabièrnè 14 di april i ta diariamente di 8'or di mainta pa 5'or di atardi. E lèsnan ta tuma lugá den e lokalnan di MBO na Kaya Korona.

Den oranan di mainta ta praktiká ku idioma hulandes. E biá akí tin atenshon

spesial pa papia i lesa den idioma hulandes.

Despues di mèrdia tin tempu pa relahá. E ora ei ta bai bich pa hasi deporte i hasi tareanan di formashon di ekipo. E tema di e aña akí ta 'Kome salú', pues ta

bai papia tokante kuminda i salú. Partisipashon ta kosta 10 dòler pa siman. Pa esaki ta haña desayuno, lunch i un t-shirt.

Pa informashon òf in-

skripshon, por mail na lezenenschrijvenbonaire@gmail.com Tambe por haña mas informashon serka dosente na skol òf via Mediabus.



BERBOU B.V.

ta buska

- 1 Deckhand

Mas inf. tel. nr **777-8777**

Consuelo
Memorial

Kaya Maria C. Hellmund-Boom 11 • Bonaire • CN
T/F: (+599) 717 3243 (24h) • info@consuelomemorial.com

Nos ta partisipá fayesimentu di

Robert John Dirksz

mihó konosi komo "Robbie Arubiano"
mekániko di Garage Ford i
HB Mobile auto repair.
* Aruba 18-02-1955
† Boneiru 31-03-2023



Na nòmber di su señora:

Marjorie Dirksz-Evertsz 'Marjie'

Su yunan:

Indira i José Margarita-Maria
Rheira Maria

†Dwight Dirksz

Sandokhan Dirksz

Su nietunan:

Evander Carlebür

Rhadamiër, Quizheiro, Zeanna i Aquinah Booi

Juanito Welvaart

Su rumannan:

Hubert Dirksz na AUA

Leonor Dirksz i famia na AUA

Manera ruman:

Enrique Valdez i famia na Hulanda

Norma Valdez i famia na AUA

Subrinonan: Clinton Dirksz na Spaña

Jovanny Piña i yunan na Hulanda

Dyane Piña i Guido Provence i yunan na Hulanda

Tanta-i tionan:

Martha Dirksz i yunan na AUA

Rudolf i Martha Dirksz v/d Berg i famia

Ruby Dirksz i famia

Rosa Croes-Webb i famia

Alberto Webb i famia

Suá- i kuñanan:

Elmslie 'Enchie' Everts na Kòrsou, Elmer 'Emichi' Everts i Elsmarie Manuel, Rugia 'Juja' Everts, Uz Everts, Jaqueline Everts, Harold 'Lol' Everts na Kòrsou, Bastiaan 'Basje' na Hulanda. Tur ku nan respektivo famia.

Prima- i primunan:

Elio Dania i rumannan, Carmen Lugo i rumannan, Norman Dirksz, Charles Tsu i rumannan, Wendy Leon i ruman, Rudolf Dirksz. Tur ku nan respektivo famia.

Amigonan di bario: Ciro Schoop, Theo de Jongh, Lesly Kuiperi, Angel Coronel, Billy Hassel i Lupi Rodriguez.

Amigonan na Bonaire: Ruth i Rafael Damascus, Ilva St. Jago-de Jongh, Jan Korevaar, Ruby i Johny Wever-de Jongh i Francis da Costa Gomez.

Famia: Dirksz, Webb, Croes, Lugo, Tsu, Leon, Maduro, Dania, Piña, Provence, Everts i Margarita.

Si den nos tristesa nos por a lubidá algun famia nos ta pidi nos diskulpa.

Despedida ta tuma lugá djarason 5 di April na Consuelo Memorial. Ta risibi bishita di kondolensia entre 12'or i 3'or na Consuelo Memorial, sigi pa un respons.

Kremashon ta tuma lugá den seno familiar.

Famia ta partisipa ku NO por risibi bishita di kondolensia despues pa motibunan fuera di nan boluntad.

Obra di Pachi Pe Mercera

Aeropuerto Flamingo kla pa Dia di Rincon

KRALENDIJK -- Pasaheronan yegando Aeropuerto Flamingo e dianan akí, no por keda sin rekordá ku fin di e luna akí tin selebrashon di Dia di Rincon.

A konstruí un eksibi-

shon na e parti di yegada, yamando bishitante un felis Fia di Rincon. Esnan ku no a buska nan pasashi kaba, lo ripará ku ya ta difísil pa haña pasashi for dia sea Aruba i Kòrsou.

Ta trata akí di un obra

Meleno 'Pachi Pe' Mercera. Bonaire International Airport (BIA) a hasi un petishon na Ofisina di Turismo pa traha e obra. Konhuntamente a pone man na obra i dia 30 di mart e entregá e obra.





F
P

Saludo i bon siman Santu. E dianan binidero ta bai tin hopi misa, selebrashon i Pasku grandi. Kemen hasi poko esfuerso pa ora yega bo turno, papa Dios mira den su lista ku bo a bishitá su kas, pues e ta duna un man saka bo fo'i bo krekechénan. No tur, pero hopi hende ta bisa nan no ta bai niun misa, pero si ta kere den Dios. Anto den beibel ta skirbi, e hende bèrdat por resa na kas, pero e mester reuní ku 2 òf 3 hende pa su atenshon serka Dios ta garantisá. No ta ami di, e ta den beibel. Poko dia pasá durante misa, pader Santiago a menshoná bon kla, bo por ta bon hende, pero si bo no ta bishita kas di Señor, bo ta leu for di Su benefisionan. Personalmente mi ta kere ta bon pa bai un misa, kualke un ku ta kere den Dios, i no warda te momentu bo ta den pèrta, sea problema òf malesa, pa akudí na Dios.

Barku ta limpi
Mi sa tende hende komentá ku riba barku debí ku e es-pasionan ta chikitu, tin biaha e parti higiena ta laga di deseá. Awèl masha bon ku mi mes a bai riba un barku al-gun siman pasá.
Mi a mira ku mi mes wowo, kon nan ta atendé ku entre otro shushi riba barku. Si, barku ku ta yega Boneiru ku turista. Impresho-nante. Ta masha poko lugá na Boneiru, e parti, no den komedó kaminda e hende ta kome, ta limpi manera riba barku. Mi ta referí riba e barku, pero e parti abou, kaminda tin mashin, motor, pipa, waya, e sitionan menshoná ta limpi limpi. Si, ègt di bèrdat limpi limpi. Asta si algu kai fo'i bo man, bo por kue i kome.

Lugánan ta nechi di fèrf, nada di lèkmentu di awa, zeta òf otro produktonan riba suela. Tur kos nechi organisá, hende pa kontrolá na tur punta. Momentu bo subi un barku, ta bon pa bo sa kuantu kos ta sosodé. Na Boneiru e barkunan no ta depositá shushi, tampoko awa shushi. Mi a keda impreshoná. Na diferente okashon mi a dal un trep riba barku krusero, pero ma sa hopi kos mas ku ta sosodé ora bo bai komo turista riba e barku, ku bo no ta tende.

PODER DI TRAHADO

KRALENDIJK- Por konklui ku sindikato Algemene Federatie voor Bonairiaanse Werknemers (AFBW) a demonstrá e gran poder di trahadó na momentu ku e grupo aki uni. Ayera, 3 di april 2023 empleadonan di Selibon N.V. na un manera basta desidido a wèlga.

Den oranan di mainta personanan deskonosí a sera portanan di Selibon pa medio di un kadena ku kandal. Despues di un ratu e direktor Rudsel Leito a laga kòrta e kadena aki. Apesar di esaki empleadonan no a reanudá trabou. Nan a demonstrá fuertemente kontra e maneho di Selibon i a entregá un resolushon na Gezaghèber Rijna. Básikamente trahadónan ta eksigí pa e hunta di komisario, Bonaire Holding Maatschappij (BHM) i Bestuurscollege di Boneiru tuma e desishon i pone e direktor Rudsel Leito di inmediato riba nònaktif i instalá un direktor interino. Ademas ta eksigí un 'nulmeting' pa determiná si bèrdat tabatin mal maneho. A duna un ultimátum di 48 ora.

Siman pasá ya tabatin un walkout di trahadó i djabièrnè último a sinta ku e sindikato. Despues a tilda gerensia di a duna trahadónan atvertensia. Esaki lo ta e famoso gota ku a pone e èmber basha afó.

Direktor afó òf trahadó afó

E inkietut den Selibon no ta algu di awe, ya pa basta tempu tin malkontentu den e kompania. Aina e walkout di aña pasá ta fresku den memoria. Meskos ku e impase pa motibu di opstákulonon pa firma Kontrato Kolektivo di Trabou (CAO). Selibon tabata basta den publisidat tokante kambio di sindikato ABVO pa sindikato AFBW. Durante kada konflikto por a nota un liña kòrá, e malkontentu pa ku e tim di maneho. Na e momentu aki, e situashon no ta diferente.

Segun Cherel Kwidama, presidente di AFBW e trahadónan no tin konfiansa mas den e aktual gerensia. Esaki debí na e trato ku gerensia ta duna su trahadónan, esta un trato di menasa kontinuo, intimidashon, papia malu, hinka miedu den e trahadónan i ku un falta di rèspèt i balorashon komo hende.

Tambe nan a trese dilanti ku ta pa motibu di mal maneho e kompania ta téknikamente bankarota i tur e ekiponan di e kompania ta den asina mal estado ku ta forma peliger pa e trahadónan.

Ta basta opvio ku e sindikato ta desidido na hiba e lucha kontra e tim di maneho di Selibon. "Si bo bandoná e lucha no ta AFBW òf ami bo a hasi daño. E daño ta pa abo mes", Kwidama a bisa su miembronan.

E kontesta di e trahadónan tabata kla i raspá.

"Direktor pafó òf nos pafó", nan a grita.

Vengansa personal

Tin rumornan persistente ku e situashon aktual den Selibon ta kreá pa motibu di vengansa personal. Ta indiká ku ta un grupito bou di guia di eks empleado Ensley Emers i konsehero di USIBO Norwin Nòchi Willem ta instigá empleadonan den un guerra kontra Leito. Emers a presentá durante e wèlga i a demonstrá su sosten na su eks koleganan. Despues di a traha 22 aña pa e kompania el a risibí su retiro na man di Leito. Emers a entamá un kaso sivil kontra Selibon i resientemente

el a risibí e desishon ku el a gana e kaso.

Si bèrdat ta trata di vengansa personal i ta yag riba kabes di Rudsel Leito, tur kos ta mustra den direkshon ku pronto nan por selebrá nan viktoria.

Sigur lo no por mantené un situashon aktual di akshon mirando ku ya kaba tin basta retraso den reko-herentu di shushi. Ki otro medida lo por tuma pa laga empleadonan reanudá nan tarea? Lo skohe pa e tranquilidad den e kompania? Lo kana kaminda legal pa obligá un paro di e wèlga?

BONERIANO a tuma kontakto ku Rudsel Leito pero e ta reservá di duna un reakshon.

Boneiru bo ta kla

Arthur Kelly
The King Show

Live di 2pm pa 4pm
a traves di bo

Radio **BròKèS** 93.5 FM
"positivo i dibertido"

Skuch'e
Di Aruba pa Boneiru

ENTRANTE;
Djárason 22 febrüari 2023

www.radio935bonaire.com

Caribbean Services General
ta buska

- 2 metselaar

Inf. tel. nr **717-9900** òf mail:
mmms847@hotmail.com

POLÍTICA

Mama di pueblo

KRALENDIJK- En trante 18 april 2023 Edison RIjna lo kuminsá den su funshon nobo komo representante spesial na Hulanda Karibense pa fondonan di Union Europeo, Fondonan di Nashonnan Uni i asuntunan ekonómiko pa loke ta trata Latino América. Na mes momentu el o baha komo gezaghèber di Enti-

dat Públiko Boneiru. Pues lo habri solisitut pa yega na un gezaghèber nobo pa Boneiru. Tin indikashon fuerte ku eks diputado Nina den Heyer lo ta ambishoná e puesto aki. Si esaki bira realidat, ta nifiká ku Boneiru un bia mas lo tin un mama di pueblo enbes di un tata.

Den Heyer anteriormente den e programa Ak-

tualidat a bisa ku e ta mira e funshon di gezaghèber komo un bunita reto i ku na su debido tempu sigur lo konsiderá pa yega na remarke. “Ainda mi no ta kla pa karga e gran responsabilidad aki”, tabata palabranan di Den Heyer durante e entrevista lunanan pasá. Awor e puesto komo gezaghèber a habri, pues si den

Heyer no solisitá, ta nifiká ku probablemente e mester warda 12 aña pa por yega na remarke. Mirando ku ta nombra un gezaghèber pa 6 aña ku posibilidat pa prolongá ku 6 aña mas.

Otro nòmber ku ta bin dilanti komo gran interesado den e funshon ta Curvin George. No ta un funshon deskonosí p’e mirando ku

na 2018 George a fungi komo gezaghèber interino. Tambe tin rumornan persistente ku Eugene Rhugenaath di Kòrsou lo ta un di e kandidatonan pa bira gezaghèber di Boneiru.

Mester menshoná ku e prosedura pa yega na un gezaghèber ta basta ekstenso i por tuma sigur 1 aña promé ku finalisá esaki.

Segun MPB:

“Arogansia di Demokrat a stroba kos”

KRALENDIJK- Partido Demokrat (DP) públikamente a tilda UPB i MPB di falta di transparensia. MPB ta reashoná pa medio di un komunikado di prensa.

E komishon di orientashon di MPB a risibí invitashon pa sinta ku DP i tambe ku UPB. Nos komishon di orientashon a sinta ku Partido DP promé ku esun di UPB riba djamars 21 di mart.

Durante e reunion e komishon di MPB a duna nos preferensia di kartera i akinan DP a indiká ku lo mester bai bèk den nan seno.

Durante e reunion e komishon di DP a indiká ku nan no lo papia tokante di kontenido di nada, ku si no tin eksklusividat riba mesa. E komishon a eksigí pa MPB papia ku partido demokrat so, i ku MPB no por papia ku niun otro partido. Esaki despues ku DP a hasi vários intento pa sinta ku UPB i tambe a firma un akuerdo ku M21. Pa MPB esaki no tabata un opshon, pasombra nos a bisa públikamente ku nos ta pará habrí pa papia ku tur partido. E komishon di DP a indiká di no lo kier papia mas si no tin eksklusividat.

Partido MPB a sinti esaki komo un falta di igualdat den e manera ku a trata nos.

Maske ku DP tin un asiento mas ku MPB, nos ta kere ku kualke gobièrnu ku forma ku otro e mester ta abase di respèt mutuo i igualdat. No opstante ku DP a eksigí eksklusividat, nos a indiká di ta dispuesto pa sigui kombersá ku DP di kompreshon mutuo sin eksklusividat.

Na final e dos komishonnan a kumbiní ku otro na mesa ku lo mantené “media-stilte” pero konsiderando ku e lider polítiko di DP a disidí di sali

bisa kosnan ku no ta bèrdat públikamente nos a haña korekto pa sali akklará.

Por bisa ku e komishon di MPB a sinta ku UPB tambe i e sentimentu di tur miembro di komishon ta ku e kombersashon aki si tabata ameno i ku respèt mutuo.

Nos ta refutá enfátikamente na ningun momento MPB tabata tin un akuerdo trahá promé ku elekshon ku UPB, manera lider polítiko di DP ta insinuá.

Din Domacasse miembro di e komishon ta amplia:

Personalmente ami mes tabata mas inkliná pa traha

ku Partido Demokrat pero di e manera ku nos a keda tratá durante e reunion mi a sinti ku no ta tuma nos komo MPB komo un opshon serio pa sinta kuné pero mas bien un “spare-tire”.

Hennyson Thielman ta bisa: despues di a evaluá e reunion ku DP i tambe esun ku UPB a reuní ku tur miembro di partido riba lista i nos a yega na e konklushon, ku nos lo sigui papia ku UPB, komo un partner igual i pa stabilitat di gobernashon pa purba yega na un akuerdo di kolishon.

Prohibí pa lubidá papiamentu

KRALENDIJK- BONERIANO ta keda vigíl tur intento pa garantisá e posishon di papiamentu na Boneiru. Durante kampaña polítiko literalmente tur partido a atmití ku mester duna nos idioma materno e balor meresé. Tur partido a primintí ku lo ankra e importansia di e lenga di

pueblo aki den nos leinan.

Sedney Marten tambe a nota e interes remarkabel di polítikonan riba e topiko aki. “Mi tambe a ripará esei i ta haña esaki remarkabel. Kisas polítikonan a realisá ku no tin muchu área mas ku despues di elekshon, komo gobernante, nan por kue tene, pasobra

práktikamente tur área di importansia ta den man di gobièrnu Hulandes. Kisas polítikonan a deskubrí den área di kultura, identidat i idioma, algu ku nan por toka kurason di e pueblo lokal votadó”, el a remarká.

Ya tin un akuerdo intergubernamental pa rekonesimientu di idioma papiamentu na Boneiru. Banda

di esaki tin un konsepto di maneho di idioma pa Boneiru. Kolegio Ehekutivo a aseptá esaki i a mand’e pa Konseho Insular. Aktualmente Akademia Papiamentu ta trahando riba un plan di implementashon. Hennyson Thielman den un entrevista a ekspresá su de-

seo pa sigui e ruta pa rekonesimientu di papiamentu bou di e Pakto Oropeo pa idioma regional òf idioma di minoria. Marten ta keda skèptiko tokante tur e bon intenshonnan. “Mi ta deseá pa nan keda ku e área aki duru tené, tambe despues di elekshon, ora nan forma gobièrnu.”


EZAir ta hiba otro piloto korte

KRALENDIJK – Mañan djárasen 5 di aprel kompania di aviashon EZAir ta hiba otro hóben piloto di Boneiru korte. E biá aki ta toka turno na Timoty Vaseur, un hóben disiplina ku semper a kumpli ku su trabou pa e kompania for di tempu ku esaki a lanta na aña 2018.

EZAir tin un trayekto basta largu den kasonan den korte riba su nòmber. Na diferente okashon e kompania a yega di hiba diferente instansia i persona korte pa un ke otro motibu. Entre otro a yega di hiba gobièrnu di Kòrsou, pa ta mas eksakto minister di transporte i telekomunikashon, kompania di aviashon Winair, Fundashon Mariadal i resientemente algun piloto.

Dos piloto

Na luna di febrüari e aña aki a hiba e eks-hefe di pilotonan di EZAir, Franklin Antoin, dilanti mesa bèrdè. E demanda di EZAir riba Antoin a keda relatá kaba pa BONERIANO na luna di febrüari. Den un otro artíkulo lo ámplia mas en detaye riba e kaso aki ku



Franklin Antoin ta bulando awor pa Western Global Airlines.

ainda ta andando.

Remarkabel ta ku riba ròl di korte sivil di Kòrsou ta aparesé otro kaso kaminda EZAir ta hiba e biá aki e piloto Timothy Vaseur dilanti. Vaseur a traha komo kapitan i instruktor riba avionnan Beech, Islander i tambe e avionnan tipo Saab 340.

Na luna di aprel aña pasá algun piloto a tuma desishon i a skohe pa sigui nan karera den eksterior. Tabata opvio i di antisipá ku e desishon di e pilotonan aki pa entregá retiru no a kai den muchu bon tera serka e ‘grandinan’ di e kompania i esakinan na nan turno a entamá guera kontra e grupo aki.

Kambio di operashon

Den kombersashon ku e grupo, nan a indiká ku for di den desèmber di aña 2021 ku maneho di e kompania a anunsiá kambionan den nan operashon. Un di e partisipashonnan klave tabata ku lo a sera e base di operashon na Boneiru i lo a move tur hende pa Kòrsou.

Setenta porshento di e pilotonan di EZAir tabata di Boneiru i bibando e tempu

ei tambe riba e isla. Mirando ku loke a ofresé nan pa muda pa Kòrsou no tabata atraktivo, a pone ku hopi di nan a kuminsá buska otro alternativa di trabou. Nan no tabata dispuesto pa sigui ku e kompania.

Generalmente nan a duna di konosé ku nan posishon di protekshon komo trahadó ta mihó respetá i sirbí na Boneiru ku Kòrsou. Esaki nan por a konkluí sigur den e temporada di COVID, kaminda ku nan koleganan na Kòrsou mester a entregá 50% di nan salario siendo ku na Boneiru esaki no tabata aseptabel pa leinan di islanan BES.

Tabata aki ku kosnan a kuminsá kue rumbo no muchu bon i por a nota un cambio den e manera ku tabata trata e pilotonan boneriano.

Intento

Tabata fin di aprel ku e pilotonan, despues di a hasi diferente intento pa yega na mesa ku e ‘grandinan’ di e kompania, sin ku esaki a logra. Tabata neglighá nan i dado momentu no a keda nan nada otro ku di entregá retiru.

E desishon aki no a kai den muchu bon tera i e kompania a skohe pa entregá e kaso den man di nan abogado Arndt van Hoof i Susy Gonzalez di Soliana Bonapart & Aardenburg III.

Despues di diferente interkambio di diferente karta e partidonan no por a haña otro i EZAir a skohe pa hiba e pilotonan korte. E promé kaso a bai dilanti kaba i ta wardando desishon di EZAir pa wak kon ta sigui, mirando ku hues a manda e partidonan mesa.

E kaso di Timoty Vaseur ta tuma lugá mañan djárasen dia 5 di aprel pa mitar di dies di mainta den sala di korte na Kòrsou. BONERIANO lo kubri e kaso.



Timothy Vaseur tambe bulando awendia pa Western Global Airlines, na unda nan ta sinti nan mes “na kas”.

Regulashon di aviashon no ta na òrdu

KRALENDIJK – E lei i regulashon di aviashon pa Karibe Hulandes ta antikuá, òf tin falta di algun tema kompleto. Ku esaki no ta kumpli na eksigensianan internashonal. Asina por lesa den e plan di akshon hulandes pa siguridat di tráfiiko aéreo pa 2023-2026.

Sin reglanan kla supervishon, no ta posibel i e siguridat no ta kompletamente garantisá. Esaki ta pidi pa un rekuperashon i modernisashon dirigí riba mas tereno. E desaroyo di e regulashon akí i e stipulashon, ta forma base pa esaki. Pero tam-

be e implementashon di supervishon efektivu den e área karibense riba base di e regulashon akí, mester tin mas konekshon i elaborashon, segun e rapòrt.

Ta eksigí atenshon spesífiko di siguridat den e relashon ku servisio di tráfiiko i aviashon, profesionalismo den investigashon di aksidente, institushon di aeropuerto, diseño di rutan i ehekushon di operashonnan di salbashon.

E puntonan di atenshon akí ta otro dor di e sirkunstansianan karibense ku Hulanda i ta eksigí yenamentu importante.

Jad's Motors B.V.

ta buska

HR Supervisor

Interesadonan por manda su CV na:

gm@jadsmotorsbv.com

Hefe nobo di Reshèrshe

KRALENDIJK -- En trante promé di april 2023, Steven Senior ta e hefe nobo di Reshèrshe di Kuerpo Polisial Hulanda Karibense (KPCN). Dia 13 di yanüari a instalá e anterior hefe di reshèrshe, Alwyn

Braaf, komo hefe di KPCN. Pa e motibu akí a habri vakatura pa un hefe nobo di e departamento di reshèrshe di KPCN.

Senior tin 22 aña di eksperensia den e departamento di reshèrshe di

KPCN, pero a kuminsá su karera na polis na aña 1998 komo agente di Kuido Básiko di Polis, BPZ i a krese di rango den transkurso di añanan.

Di 2001 te ku 2017, Senior a funshoná komo

reshèrshe. Na 2017 a Seguridat, a postulá Senior nombr'é komo shèf na e serka Rei, pa e nombra departemento di reshèrshe. mentu komo hefe nobo di

Minister di Hustisia i Reshèrshe di KPCN.



Dabboussi Motors B.V.

ta buska

**un (1) Elektro Mekániko
tres (3) Mekániko
dos (2) Mekániko (sakadó di sla)**

Interesadonan por manda su CV na
gm@jadmotorsbv.com

SALBASHON – ÒF BO TIN E ÒF BO NO TIN E!

“Pasobra Dios a stima mundu asina tantu, ku El a duna Su Yu unigénito, pa ken ku kere den djE no bai pèrdí, ma tin bida etèrno.” Juan 3:16(BS)

Un versíkulo hopi konosí ku hopi hende a siña i memorisá for di tempu nan tabata mucha. Siña i memorisá ta diferente for di komprendé. Awe laga nos ban para ketu na algun di e verbonan den e versíkulo akí, pa sa kiko realmente nan ta nifiká.

A stima – Un amor inkondishonal; Dios a stima nos promé ku nos por a hasi algu pa kual nos mester risibí stimashon. El a stima nos den nos kondishon di piká (Romanonan 5:8).

A duna – Dios a entregá Su Yu na kondenashon i kastigu pa nos motibu.

Kere – Konfiansa i fe firme den Señor Hesus (Úniko kondishon!)

Tin – Ta risibí e regalo di bida eterno serka Dios.

Kiko ta bida eterno? Salbashon for di morto eterno, pa bida ku Señor pa tur eternidat - Regalo di Dios!

Salbashon ta un regalo di Dios i ningun hende no por traha pa esaki. Juan 3:16 ta bisa: “... pa ken ku kere ...”; esei kier men ku hende no ta salbá outomátikamente. Sea bo ta kere den Hesus i ta salbá pa eternidat òf bo no ta kere den Hesus i ta pèrdí pa eternidat.

Na momento ku bo kere i risibí Señor Hesus komo bo Salvador personal, bo no por pèrdè bo salvashon pasobra salvashon ta eterno.

Salbashon den Kristu ta un promesa kumplí di Dios!

Gilda Beukenboom-Sintjago
Produkshon PGM



Programanan di Bonaire.tv

TELBO kanal 70
Flamingo TV kanal 23

Djamar 4 april 2023

12.00 Herensia:	Elvia Cornelis-Jacoba
13.00 Aki Boneiru:	Kushinamentu Fleur
14.00 Herensia:	Rudy Everardo Janga (Soldá)
15.00 BAPA:	Maskarada Antriol
16.00 Aktualidat:	Alvin i Tirza Obersi
17.00 Aki Bonaire:	85 Aña Adelfa Dé St Jago
18.00 Herensia Kursou:	Sidney Sambo
19.00 BAPA:	Miralda Paula-Frans
20.00 Herensia Korsou:	Elvio Serapio Piernella
21.00 Aki Bonaire:	Robert Pikeri
22.00 Herensia:	Juliana Josefina Angela-Martilio
23.30 Puerto Latino:	Luis Zárraga

Tur mèrdia 12'or ta kuminsá un programashon nobo di 4 ora.
E programashon aki ta ripití pa 24:00.

DUSHI TEMPU DI TELEVISION

Ku e seri aki mi ke hiba boso den tempu. Mi ke rekordá huntu ku esnan ku a lanta den añanan sesenta i setenta television di e tempu aya. Television “pretu ku blanku”. Tambe pa laga e generashon despues sera konosí ku loke tabata dibertishon pa mucha, hóben i adultonan den dékadan sesenta i setenta riba nos isla. TeleCuraçao a drenta operashon dia 31 di yuli 1960.

Hawaii Five-O


Un dje serinan polisial di mas eksitoso na television merikano tabata Hawaii Five-O. CBS a produsí e seri aki, ku a kore di 20 di sèptèmber 1968 te april 1980. Ketu bai e seri aki ta pasando na stashonnan merikano. Pues ripitishon di e episodio-

nan produsí durante e periodo ei. Kreadó di Hawaii Five-O tabata Leonard Freeman, kende nos ta mira komo kreadó di mas seri di television den añanan sesenta. A filma mayoria episodio di Hawaii Five-O na Hawaii, grupo di isla ku ta

representá un dje estadonan merikano. Algun episodio a filma tambe na Los Angeles i Singapore, entre otro. Nunka ningun seri polisial no a logra asina tantu episodio den historia merikano. E seri a kuminsá ku Jack Lord den e papel

principal di Captain Stephen (Steve) McGarrett, e hefe di un forsa polisial estatal espesial na Hawaii. Especialmente e tema musikal komponé pa Morton Stevens ta hopi konosí i gustá. Hopi di e episodionan ta kaba ku e ekspreshon típiko di McGarrett: “Book ‘em”. E forsa polisial su kuartel tabata den un edifisio haltu situá den sentro di Honolulu, kapital di Hawaii. Otro funshnarionan den e tim di Hawaii Five-O ta enserá e aktornan



Danny Williams, Chin Ho Kelly Kono Kalakaua. Protagonista Jack Lord su nòmber mes tabata John Joseph Patrick Ryan. El a muri dia 21 di yanüari 1998 na edat di 77 aña. Ko-protagonista James Gordon MacArthur a muri dia 38 di òktober 2010 ku 72 aña di edat. Tur otro aktor di Hawaii Five-O tambe a fayesé.



MONCHI & TONCHI

Tempu a puntra tempu kuantu tempu tempu tin.

Awèl sí. Anto tempu a kontestá tempu ku tempu tin e tempu ku tempu tin.



KOLOFÓN

Editor: Bonaire Communication Services N.V.
Kaya Irlanda 12,
Tel. 717-8482
Redakshon: extrabon@gmail.com
avisobon@gmail.com
Wèpsait: www.extraboneiru.com
Facebook: Extra Boneiru

Direktor
Shirley Martis
785-3824
796-3824

Partner na Aruba
Awe Mainta
Partner na Kòrsou
Extra
Partner na Boneiru
Live99

Redakshon
Papi Antoin
Nathaly
Evertsz-Ipcedencia
Davienuska Janga
Velli Gijsbertha
Edson Pietersz
Ibi Piar (deporte)

Layout
Davienuska Janga
Maya Beaumont

Konsehero:
Bòl Antoin
786-6818
Aviso
avisobon@gmail.com

Programa 'Bonaire Tourism Scholarship' ta habrí pa aplikashon

KRALENDIJK -- Aña ku Guardian Group Fatum pasá Tourism Corporation (GGF), pa konhuntamente Bonaire (TCB) a firma un lansa un inisiativa edukati-vo pa komunidad boneriano akuerdo di kolaborashon titulá 'The Bonaire Tourism Scholarship Program'. Komo parti di TCB su ophetivonan di turismo ta pa eduká i inspirá e komu- nidad boneriano, a desaroyá e programa akí pa mehorá profeshonalnan den e indu-

stria di turismo.

Na 2022, en total risibí 59 registrashon i tabatin total 19 kandidato ku a bini na remarke. TCB ke sigui enkurashá komunidad pa probechá di e oportunidat úniko akí, pa por sigui desaroyá nan abilidad. E aplikashon pa e programa ta habrí for di awor te ku 9 di yüni. Pa registrá i pa lesa mas tokante e tremendo inisiativa akí, bai riba www.bonairescholarship.com

'Bonaire Tourism Scholarship Program' ta yuda funda kurso individual di desaroyo profeshonal i kurso akadémiko fultaim riba tur tereno di hospitalidat i maneho di turismo pa programanan riba nivel di MBO, Bachelor i Master. E beka di estudio ta hasi posibel pa studentenan i no-studentenan meritorio pa alkansá nan metanan edukativo i profeshonal i pa realisá nan soño. Ademas e programa di beka di estudio, ta hasi posibel pa e partisipantenan pa hasi uso di e posibilidatnan pa kontinuá ku nan desaroyo profeshonal. E beka di estudio akí ta un medio efektivo tambe pa mehorá tumamentu den servisio di hendenan lokal i stimulá preservashon i kresementu profeshonal den sektor turístiko di Boneiru. Den kolaborashon ku GGF, TCB ta otorgá beka di estudio individual na minimalmente 10 partisipante pa kada aña akadémiko. E bekanan di estudio ta funda entre 200 te ku 3000 dòler pa kada aña akadémiko, dependiente di e tipo di programa ku e partisipante skohe i e partisipantenan lo risibí esaki den e promé aña di nan estudio. Ta otorgá e bekanan di estudio solamente pa paga e estudio i ta entregá e sèn direktamente na e universidat, òf 'hogeschool'. E beka pa estudio akí no ta un beka pa paga e gastu di estudio kompleto, e partisipantenan pues tur aña di nobo tin ku hasi un petishon pa risibí e beka di estudio.



Mental Health Caribbean (MHC) verzorgt de geestelijke gezondheidszorg op Caribisch Nederland. Onze ambitie is de kwaliteit van het leven van de inwoners van Caribisch Nederland te verbeteren. Wil jij als ervaren behandelaar je steentje bijdragen aan de zorg? En vind jij het als psycholoog leuk om met ouderen en in een medische setting te werken? Dan zijn we op zoek naar jou!

Medisch GZ-psycholoog (20-32 uur per week. Standplaats: Bonaire)

Wat ga je doen?

Je gaat vanuit MHC aan de slag binnen het ziekenhuis Fundashon Mariadal (FM) en het verpleeghuis Kas di Kuido. De focus van je werk ligt op (oudere) patiënten met neurocognitieve functiestoornissen. Binnen de ouderenzorg ben je verantwoordelijk voor de psychodiagnostiek (geheugenpoli) en psychologische behandeling van cliënten met neuropsychologische/psychogeriatrische problemen. Je voert zowel psychodiagnostiek (NPO) als psychologische behandelingen zelfstandig uit.

Samen met je collega medisch psycholoog ben je binnen FM ook inzetbaar voor medisch-psychologische behandeling en consultatie bij (poli)klinische patiënten met psychische problemen.

Als GZ-psycholoog ouderenzorg help je ouderen met complexe en chronische problematiek op zowel somatisch en/of geriatrisch en/of psychiatrisch vlak. Je werkterrein is deels intramuraal (Kas di Kuido en ziekenhuis), deels extramuraal (poli en huisbezoeken).

Je werkzaamheden bestaan uit:

- Je voert intakes uit met cliënten en heteroanamnese met hun familie en naasten (systeem)
- Je verricht aanvullende neuropsychologische diagnostiek (NPO)
- Je brengt adviezen uit over de zorgbehoefte en psychologische behandeling en bejegening
- Je geeft psycho-educatie aan cliënten, hun systeem en het team over de klachten en/of stoornis, de behandeling, de prognose en de manier waarop hiermee om te gaan.
- Je stelt behandelplannen op, voert zelfstandig psychologische behandelingen uit en geeft gedragsadviezen aan zorgverleners
- Je doet huisbezoeken voor diagnostiek en behandeling van thuiswonende cliënten.
- Je doet consulten binnen verpleeghuis Kas di Kuido en het ziekenhuis.
- Je levert een bijdrage aan multidisciplinaire overleggen (MDO).
- Je denkt mee over zorginhoudelijk beleid en de ontwikkeling van de (psychogeriatrische en gerontopsychiatrische) ouderenzorg op Bonaire
- Je werkt nauw samen met andere disciplines zowel intern als extern
- Je draagt zorg voor een zorgvuldige dossiervoering en cliëntregistratie in het EPD.

Functie: Wat vragen wij van jou?

- Je beschikt over een afgeronde opleiding tot GZ-psycholoog, met kennis en expertise over de neuropsychologie en/of ouderenpsychologie
- Je beschikt over meerdere jaren werkervaring en over een brede kennis van psychopathologie
- Werkervaring in de ouderenpsychologie, specifieke met de doelgroep ouderen met neurocognitieve functiestoornissen, is een pré.
- Je werkt en denkt systemisch.
- Je hebt kennis van het omgaan met cliënten van verschillende etnische achtergronden.
- Je houdt je binnen het vakgebied actueel/up to date door/middels aansluiting bij de betreffende beroepsvereniging.
- Je spreekt Papiamentu en Nederlands óf hebt een talenknobbel zodat je Papiamentu jezelf snel eigen kunt maken. Het spreken van Spaans en/of Engels is een pré.
- Je kunt je schriftelijk en mondeling goed uitdrukken en bent zorgvuldig en tijdig in je dossiervoering en administratie.
- Je hebt een flexibele werkhouding, kunt zelfstandig werken en bewaakt je eigen grenzen.

Organisatie: Wat bieden wij?

Inschaling hangt af van je achtergrond en werkervaring en vindt plaats in FWG 65 (min \$ 4.533,- en max \$ 6.625,-). De bedragen zijn bruto per maand bij een fulltime dienstverband (40 uur). We bieden een contract voor de duur van twee jaar, met mogelijkheid tot verlenging.

Verder bieden we een dynamische werkomgeving met ontwikkelmogelijkheden en goede secundaire arbeidsvoorwaarden. Zo draagt MHC ruim bij aan je pensioenopbouw en wordt er tegemoet gekomen in de eventuele verhuis- / emigratiekosten.

Kom je ons team versterken?

Heb je interesse in deze functie, stuur dan je sollicitatie en CV **vóór maandag 24 april 2023** naar

secretariaat@mentalhealthcaribbean.com

De (online) gesprekken vinden plaats op dinsdag 2 mei 2023 en woensdag 3 mei 2023

Indien je vragen hebt kun je contact opnemen met **teamleider Signalda Domacassé (+599 7961021 of signalda.domacasse@mentalhealthcaribbean.com)**

Bij gelijke geschiktheid genieten kandidaten uit het Caribisch Gebied of kandidaten die hun wortels hebben in het Caribisch Gebied de voorkeur.

Andere vacatures

Voor MHC zijn we met regelmaat op zoek naar meer enthousiaste, nieuwe collega's! Kijk voor alle actuele vacatures op onze website: **www.mentalhealthcaribbean.com/vacature**

Acquisitie wordt niet op prijs gesteld.

Eksitoso dia habri na L.V.V.

Un biaha mas eksitoso dia habri na L.V.V. Djadumingu 2 di april, kantidat di hende a pasa na L.V.V., pa mira, kumpra i disfrutá di e ambiente. Diferente komentario, pa promé biaha nan a bai e aktivitat i no tabata sa ku e ta asina bon bishitá. No solamente adulto, pero adulto mayó i mucha chikitu, tur a pasa un momentu plasentero. Esei ta loke hendenan tabata komentá durante e aktivitat.



Janilsa Offerman ganadó Kanto Krioyo Hubenil

KRALENDIJK -- Djadumingu Janilsa Offerman a bolbe bai ku e premio máksimo Kanto Krioyo Hubenil 2023. No solamente e, pero tambe agrupashon musikal FMK, a bolbe gana.

Djasabra nan a bai ku e premio máksimo di Kanto Krioyo Grandi. E dirigente tabata mas ku kontentu, su trabou fuerte i serio ku e grupo di hóbennan a duna tremendo resultado.

Tico Balentien a resultá tantu pa Kanto Krioyo Hubenil komo grandi, e mihó areglista. Promé ku a saka e ganadó apso-luto, maestro di seremonia, Aimed Ayubi, a yama e

promé finalista i e ganadó dilanti.

Tabata notabel, ámbos hopi nèrvioso i emoshoná, ken ta bai gana. Momentu a menshoná e ganadó, ámbos no por a kontené nan lágrima di tenshon.

Resultado:

Mas popular Janilsa Offerman FMK

4. Swenthely Mercera
3. D'ange St. Jago J&C Friends

2. Mayci Trenidad Jom & Company

1. Raiza Wilsoe J & C Friends i ganador apso-luto Janilsa Offerman kantando ku FMK.





Nishanthalie Molina ku 'Always Glow'

Hobensita di 10 aña ku su mes negoshi

KRALENDIJK -- Nishanthalie Molina, un hobensita di apénas 10 aña, ya tin su propio negoshi. 'Always Glow' ta nòmber di e produkto ku e ta vende. Ta trata di Lipgloss. Anto pa koroná obra, no solamente e ta vende e produkto, pero e mes ta traha e Lipgloss. Aki aya su mama ta dun'é un man. Mas ku klaro, e no por hasi sierto kos.

Ya Nishanthalie Molina tin mas o ménos 1 aña ta traha i vende su mes

produkto, yamá Always Glow. E tin un grupo di kliente ku ta masha kontentu kuné. Tin algun mucha chikitu, ku konosé Nishanthalie su 'lipgloss' i tur kaminda nan top'é, ta obligá nan mayor pa kumpra kos. E mes ta konta sèn i debolbé e kliente sèn. Di e manera aki e ta siña konta stabil i tin bon balor di sèn.

Riba potrèt Nishanthalie, durante Taste Òf Bonaire na Rincon, wikènt pasá.



Eksitoso dia di inskripshon na MBO

KRALENDIJK -- Despues di algun aña, atrobe MBO por a organisá un dia habrí, kaminda por a inskribí pa bai e skol personalmente. Si por a inskribí pa medio di online. Liset de Keijzer, direktor di MBO a bisa e ta kontentu kon ta bayendo ku e dia di inskripshon i si e ke remarká, pa hendenan kumpli

ku palabrashon.

"Nos a manda 200 invitashon, mas ku 50 kolega tabata presente pa yuda e famianan. Tin hopi hende no a kumpli ku e palabrashon, esei ta un desepshon pa nos. Ta importante pa e hende presentá. Sigur ta bai tuma kontakto atrobe ku esnan ku no a presentá riba e dia. Ta importante

kumpli ku e palabrashon. E ta parti di bo formashon i estudio. Si mi mester bisa, nos ta skol ta kontentu ku esnan ku a bini. BBL ta hañando hopi atenshon. Ta trata di un forma di studia i traha, loke hopi ta hasiendo awor. Ya tin 15 di e opleiding i hendenan ta kontentu esei. Pa loke ta trata e parti di atministras-

hon, tin 3 opleiding di nivel 2, 3 i 4. Tambe hopi hende ta buska informashon pa estudio di maatschappelijkezorg. E dia a bai bon. Hendenan a pasa pa tuma informashon. Despues di april, mei tam-

be por inskribí pa un kurso. Djis pasa personal, esei ta mas mihó pa komuniká. Pero riba e website di MBO www.mbobonaire.com tin informashon amplio.



Manera ta e kustumber djamars anochi 4 di aprel 2023 lo tin e Misa Krismal na Katedral di Pietermaai.

Ta trata aki di un selebrashon relashoná direktamente ku Djaweps Santu, pero ku pa rasonnan práktiko, kaminda tur saserdote por partisipá na dje, ta selebr’è riba e promé dianan di Siman Santu. E ta e misa di renobashon di promesanan saserdotal i di bendishon di e zetanan santu ku na final di misa e saserdotenan ta pasa rekohé nan pa hiba nan na nan parokia, for di kua ta atministrá nan p’asina fielnan por risibí e sakramentunan di boutismo, konfirmashon i huntamentu di enfermonan (Santoli).

E Misa Krismal ku ta ser selebrá dor di e Obispu ku tur saserdote di e diósesis, ta un di

*Djamars 4 di aprel 2023 pa 7’or di anochi den katedral di Pietermaai
Lo no tin Misa riba e anochi ei den ningun parokia aki na Kòrsou*

e prinsipal manifestashonnan di e plenitut saserdotal di e Obispu i komo signo di e union estrecho di e saserdotenan kuné. Den dje ta konsagrá e Santu Krisma i ta bendishoná e zetanan di katekumenonan i zeta di enfermonan.

E Santu Krisma, kier men e zeta perfumá ku ta representá Spiritu Santu mes, ta ser untá na nos huntu ku su karismanan riba dia di nos boutismo i di nos konfirmashon i tambe den ordenashon di saserdote i obispu.

E palabra krisma ta bini di latin: chrisma, ku ta nifiká huntamentu. Asina ta yama e zeta i

Misa Krismal

bálsamo mesklá ku e obispu ta konsagrá pa hunta esnan ku ta ser batisá i marka esnan ku ta konfirmá. Tambe e Obispunan i saserdotenan ta ser huntá ku esaki riba dia di nan ordenashon sakramental.

Liturgia kristian a akseptá uso di Tèstament Bieu, den kua reinan, saserdote i profetanan tabata ser huntá ku e zeta di konsagrashon, ya ku nan tabata e prefigura di Kristu, kual nòmber ta nifiká “esun huntá di Señor”. Ta traha krisma ku zeta i aroma o materia

ku ta hole dushi pa nifiká **“e bon oló di Kristu”** ku kua ta despedí di esnan batisá.

Ku e zeta di katekumenonan ta ekstendé e efekto di eksorsismo, pues esnan batisá ta fortalecé, ta risibí e forsa divino di Spiritu Santu, pa nan por renunsia di malu, promé ku nan bolbe nase di e fuente di bida den boutismo. E zeta aki ta un sorto di krema di hunta di koló bèrdè/gel ku nan ta saka di oleifi i otro matanan.

E zeta di enfermonan, kual uso Apòstel Hakobo ta testiguá,

ta remediá e dolónan di alma i kurpa di esnan enfermo, p’asina ku nan por soportá i vense ku fortaleza e enfermedat i haña pordon di pikánan. E zeta ta simbolisá e vigor i forsa di Spiritu Santu. Ku e zeta aki Spiritu Santu ta animá nos i transformá nos enfermedat i nos morto den sakrifisio salvador manera esun di Hesus.

Relashoná ku esaki lo no tin selebrashon di Misa den ningun parokia djamars awor 19 di aprel den ningun parokia aki na Kòrsou i ta bon pa tantu nos saserdotenan komo fielnan tene kuenta ku pidimentu di Misa pa kualke intenshon riba e dia ei.

2 kos ku bo mester hasi promé ku Kuaresma kaba

Caryn Rivadeneira

Ser amabel parse fásil, pero lo bo keda sorprendí di lo difísil ku e ta. E ta algu nos tur lo mester praktiká kada dia, pero den loke nos mester enfoká nos espesialmente durante Kuaresma. Esaki ta e 3 komponentenan ku e famoso eskritor hesuita James Martin ta usa pa pone den praktika e amabilidad den su bida diario:

1. No sea brutu. **“Aunke bo ta kansá, débil òf fadá òf frustrá òf di strès, no tin nesesidat pa transmití bo miseria na e persona banda di bo. Bo por skohe pa no ta brutu”**.
2. “Honra esnan ousente. **Basta di papia trai lomba di hende**. Nada ta mas dañino pa e ambiente sosial. Esaki lo laga e hendenan sinti nan mes malu ora nan haña sa. I normalmente ta kaba kuna ta haña sa”.
3. I por último: “Duna e benefisio di duda. **Si bo no ta sigur di loke un persona ke bisa -konsehá-, puntra. Semper asumí bon motibunan**. E por parse un detaye chikí i ser amabel lo por parse

opvio, pero e ta den sentro di e bida kristian”.

Amabilidad ta bira mas fásil ora bo establecé otro praktika spiritual, un ku lo hasi nos bon den mantené despues di ku Kuaresma kaba: **keha ménos**.

“Stòp di keha asina tantu”, Martin ta bisa. “Un di e kosnan di kua mi a duna kuenta últimamente ta lo desagradabel ku ta kehamentu konstante. I ku kua frekuensia e ta kondusí na falta di speransa. Mi a konosé algun poko kampeon di kehamentu i inkluso un espasio kòrtiku di tempu banda di nan a laga mi sinti mi mes malu”.

“Por supuesto ku ta importante kompartí bo frustrashonnan i lucha ku bo famia i amigunan, i ku Dios den orashon, pero no ta hasi falta ser konstantemente negativo ku tur persona konosí rònt di bo”, el a añadí.

E benefisio? Martin ta bisa ku e praktika aki ta hasié “muchu mas felis i sereno. **Ya mi no ta fuente di kehamentu, asina ku mi no ta desanimá otronan i mi no ta arepentí tantu di loke mi ta bisa. E ta un praktika bastante saludable”**.

Martin ta atmití ku bida tin e tendensia na imponé su mes riba e kaminda di e praktika partikular aki. “Bida semper ta

poniendo algun opstákulo riba bo kaminda – salú malu, problemanan ekonómiko, luchanan den famia i na trabou, ... -, asina ku kehamentu ta fásil, e ta parse natural, pero e klave ta na sa ku bo no mester keha, abo ta skohe”.

Espesialmente, e hesuita a indiká, na e lus di resureksion, ku nos ta spera durante Kuaresma. “Ora bo ta rondoná di kristiannan ku ta keha konstantemente, bo ta kuminsá na puntra bo mes si realmente nan ta kere ku Kristu a resusitá, ku nada ta imposibel pa Dios, i Ku Spiritu Santu ta poderoso entre nos”, e ta bisa.

“E negatividad venenoso aki por hiba nos bèk na graf. Manera si tur speransa lo tabata pèrdí. Pero **resurekshon**, e kapitùlo final di e historia di Kuaresma, ta un Bon Notisia!”.

Biba e Bon Notisia aki sin keha asina tantu – Martin ta konkluí- lo hasi bo sinti bo mes mas felis i lo hasi e otronan rondó di bo mas felis. “Tambe lo bo sinti bo mes mas agradesidu ora bo atenshon ta stòp di enfoká riba kosnan chikí molestoso”, e ta konkluí, “asina ku mas felisidat pa bo i pa tur otro, ki mihó pago ku esaki?”.

“Ami ta resurekshon i bida”

Dikon Siman Santu ta kambia di fecha kada aña?

Outor: Teresa Vallés

E Aña litúrgiko no Ta tene su mes estriktamente na e aña kalènder, sino ku e ta varia di akuerdo ku e siklo lunar.

Nan ta konta e historia, ku riba e anochi den kua e pueblo hudiu a sali di Egipto, tabatin luna yen i esaki a permití nan pa no usa lampinan p’asina ku e sòldánan di fárao lo no a deskubrí nan.

Hudiunan ta selebrá e akontesimentu aki kada aña den e Pasku hudiu òf “Pesaj”, ku semper ta konkordá ku un anochi di luna yen, den rekuerdo di e israelitanan ku a hui di Egipto pasando dor di Laman Kórà.

Nos por ta sigur, por lo tantu, di ku e promé Djaweps Santu di historia, ora Hesus tabata selebrá e Pasku hudiu ku su disipelnan, tabata un anochi ku luna yen.

Ta p’esei, Iglesia ta fiha e Djaweps Santu den e luna yen ku ta presentá entre e luna di mart i aprel i tumando e fecha aki komo sentro di e Aña litúrgiko, e sobra fechanan ta move den relashon ku esaki i tin algun fiesta ku ta varia di fecha un òf dos siman.

E fiesta ku ta kambia aña pa aña, ta:

- Djarason di Shinishi
- Siman Santu
- Pasku di Resurekshon
- Asenshon di Señor
- Pentekòster
- Fiesta di Kristu Rei

Tambe tin fiestanan litúrgiko ku nunca ta kambia di fecha, manera por ehèmpel:

- Pasku di Nasementu
- Epifanía
- Kandelaria
- Fiesta di San Pedro i San Pablo
- Asunshon di la Bírgen
- Fiesta di tur santu

STATIA/SABA/ST. MAARTEN

Enkuentro ku Alpha Leo Club i Parlamento Hubenil

PHILIPSBURG – Djasabra 25 di mart Minister di Hustisia, Anna Richardson i Minister di Hubentut i Deporte, Drs. Rodolphe Samuel, a topa ku Alpha Leo Club di Sint Maarten i Parlamento Hubenil, pa diskutí uso di despositivo di nikotina bou di hubentut di Sint Maarten.

E ministernan tabata presente ku un proposishon prepará pa e studiantenan ku e meta pa atendé

ku diferente solushon. E proposishon ta inklui tambe un investigashon di e porsentahe di hubentut ku ta komprometé ku e reto.

Durante e kombersashon, e studiantenan a papia tokante kon fásil ta pa haña aksesu na despositivo di nikotina.

Tur partido ta di akuerdo ku mester aktualisá e leinan pa prohibí benta di nikotina ku hubentut. Ámbos klup tin e intenshon pa tene kon-

venshon na skol meskos tambe kampaña den media ku e meta pa musta e im-

paktonan negativo di uso di nikotina.

E ministernan a sigurá

e studiantenan ku uso di nikotina bou di hubentut tin atenshon di Gobièrnu.



Miembro nobo Kolegio Elektoral

ORANJESTAD (EUX) – Kuater di e sinku miembronan nobo eligí di Kolegio Elektoral, a asumí nan funshon djaweps.

Despues ku e komishon elektoral sentral a konfirmá resultado di elekshon di siman pasá i

a repasá e kredensialnan di e kandidatonan eligí, e kuater miembronan eligí a risibí nan enkargo.

E di sinku kandidato, Raime Richardson, no tabata riba e isla i lo asumí su enkargo riba un fecha mas despues.



Dabboussi Developments BV

ta buska

un (1) mètsla

un (1) lasser

Interesadonan por manda su CV na

info@dabboussiholdingbv.com

tel. 717.3666



Área di espera pa pasaheronan di fèri

THE BOTTOM – Entidat Públiko Saba, den kolaborashon ku e kontratista lokal, Work Monster, a instalá un kòntainer modifiká na Fort Bay, kaminda pasaheronan di fèri por warda

riba nan biahe. E iniciativa a bini for di diputado Bruce Zagers, kende a sinti ku mester hasi algu pa protehá e pasaheronan di fèri kontra solo i áwaseru. E staf di haf tabata enbolbí pa bini ku

un manera pa krea akomodashon pa e pasaheronan di fèri. Zagers en partikular a mensioná Omar Johnson, kende mesora a bai di akuerdo ku e idea i kende a duna un aporte balioso.



Doño tabata tene nan den isolashon total

Kas yen di bestia deskuidá

ROTTERDAM – Riba un tereno tres di un kas na Rotterdam, e servisio di inspeksion nashonal pa proteksion di bestia, LID, siman pasá a topa ku un grupo di bestia seriamente deskuidá. Ta trata di un krusada di kachó tipo wòlf,

dos otro kachó i dos pushi, ku e doño tabata tene tur den isolashon total. Esaki LID ta informá djaluna.

E bestianan debí na isolashon, tabata demostrá un komportashon ku hopi miedu. E servisio di inspeksion a tuma tur e be-

stianan den beslag i hiba nan un lokalidat sekreto.

Despues di a risibí un notifikashon, LID a bai tira bista den e kas. Ya nan tabatin sospecho ku tabata trata e bestianan malu, entre otro pasobra bisiñanan a konta ku anochi hopi biá nan tabata tende un wòlf yora.

Durante e kontròl a topa ku e wòlf, den un kouchi riba un flur di betòn, sin ningun forma di iluminashon, ventalisashon, awa òf kuminda, e servisio di inspeksion ta informá. E kas tabata hole amoniak fuerte. E bestia parse no tabata mira bon i tabatin hopi miedu, probablemente dor di ta será solitario.

Den mesun depósito tabatin tambe un kouchi ku

dos pushi belgikano aden. Den e kouchi sushi yen di pupu i pishi, tabatin apénas lus i e bestianan akí tambe tabata hasi un impreshon di hopi miedu. E bestianan akí tampoko tabatin kuminda. Sí tabatin un kantidat limitá di awa sushi.

Na un otro sitio riba e tereno tabatin dos kachó,

hopi leu for di otro den kouchi yen ku sushi. Un di e bestianan tabata tras di un muraya i kurá haltu. E bestia yen di miedu tabatin herida i tampoko tabatin kuminda i awa.

E doño di e bestianan a haña un prosèsverbal, miéntras Ministerio Públiko ta investigando e kaso.



Korte ta haña violensia ku arma ménos fuerte

Te 15 aña di prizòn pa atrakadónan transporte di plaka

AMSTERDAM – Korte a duna kastigu di prizòn te 15 aña pa e grupo franse-belgikano di ocho persona, ku ta keda tené responsabel pa atrako dia 19 di mei 2021 riba Schöne Edelmetaal

na Amsterdam-Noord i e violensianan ku a sigui na Broek na Waterland.

Dia 15 di novèmber aña pasá Ministerio Públiko a eksigí 18 aña di prizòn pa shete hòmer i 5 aña pa

un ko-sospechoso, debí na un atrako ku a produsí 4,2 mion euro. Un parti di e botin total di 14,5 euro, ainda ta pèrdí.

Korte a pone ménos kastigu, pasobra e no ta haña e violensia ku arma di kandeladi e grupo fuerte, manera Ministerio Públiko a indiká un aña i mei atras. Hopi agente polisial a deklará ku a tira dirigí riba nan durante huida di e atrakadónan direkshon Broek na Water-

land.

Korte a yega na e konklushon ku no ta tur e atrakadónan a tira. Tur hende naturalmente konosé e atrakadó ku tabata para tira den laira pafó di Schöne Edelmetaal, otro banda di Canta. El a haña 12 aña di prizòn. E atrakadó ku a tira dirigí riba un outo di polis, un hòmer di 39 aña, a haña e kastigu di mas haltu, 15 aña.

Ta konsiderá e hòmer

ber di 45 aña komo e lider i e tambe a haña 15 aña di prizòn. El a duna e señal pa kuminsá. Tambe el a hasi preparashon pa e atrako, manera eksplorashon i a hür un apartamentu kaminda el a prepará e atrako huntu ku e otro sinku sospechosonan, tres hòmer a keda sentensia na 10 aña di prizòn pa nan ròl di e atrako. Dos hòmer di 20 aña a risibí respektivamente 6 i 2 aña di prizòn.



Detenshon pa asesinato

SITTARD – Polis a detené un hòmer sospechá di asesinato di Xavier Durlinger di Sittard. Ta trata di un hòmer di 23 aña for di mesun sitio.

Na mei aña pasá Durlingen di 19 aña a desaparecé. Un siman despues a haña su

kurpa sin bida den un mondi den su barrio.

Polis a saka afó ku ta un krimen. Durante e investigashon a investigá diferente kas. Tambe e kaso a haña atenshon kuater biá den Opsporing Verzocht, 1Limburg ta skirbi.

Dia 7 di mart den e programa di búskeda, a pidi atenshon pa un siklista. Por a mira esaki riba diferente imágen di kámara i a keda mirá komo e posibel testigu. E baikel riba kua e tabata kore posiblemente ta di e víktima. E petishon

a produsí 120 tep di televantenan. E hòmer ku awor a detené ta e siklista enbolbí. Anteriormente a arestá un hòmer di 19 aña ku tabata enbolbí na asesinato di Durlingen. Na yüni 2022 a laga e sospechosonan aki den libertat, paso-

bra su DNA no ta kuadra ku e spor ku a haña kaminda a haña kurpa di e víktima.

E sospechoso di 19 aña formalmente ainda ta sospechoso. Esaki ainda ta asina, e investigashon ta andando, segun un bosero di Ministerio Públiko.

ARUBA

Polis a scapa piscado cu a haya bulto di cocaina di su morto

ORANJESTAD -- Ta danki cu Polis a haya tip, a yega na Dennis Stamper. Un piscado cu a haya un bulto cu 20 paki di cocaina. Si Polis no a yega na dje, probablemente e doñonan di e cargamento lo a kita su bida. Esaki pasobra ya nan tabatin contacto cu ne y tabata sa ken e ta. Den Corte e piscado aki cu a scapa milagrosamente kier a kita tur cos for di su lomba, haciendo como sifuera cu e no a pensa mes cu e bulto lo tabatin droga sino te algun dia despues, ora cu el a lesa esaki den prensa.

Corte a trata diabierna mainta caso di un piscado cu a haya 20 kilo di cocaina y un tiki mas el a perde

su bisa. Dennis Stamper hunto cu su pareha a bay pisca na Boca Druif. En bes di pisca a haya bulto di 20 kilo. Ora cu a cuminsa bende droga e doño a hera likid'e.

Yicauris de la Rosa (pareha di Stamper), Yilario Schmidt y Pedro Vrolijk, tabata e otro acusadonan diabierna mainta den Corte. Ministerio publico a acusa nan cu den e periodo di augustus pa october 2022, nan a transporta, entrega of tabatin den nan poder cierto cantidad di cocaina. Den e caso di Stamper y su pareha ta papia di 20 kilo, den caso di Schmidt ta 10 kilo y Vrolijk 5 kilo.

Na inicio di augustus tabatin un cantidad grandi di bulto di cocaina a yega costa di Aruba. Autoridadnan a confisca un total di 19 bulto y den cada bulto tabatin 20 paki di mas o menos 1 kilo. A resulta cu aparentemente tabata falta por lo menos un bulto. Esun cu Stamper a pisca. Tabata den e mesun luna ey cu Dennis Stamper (24) a bay pisca cu su pareha Yicauris de la Rosa (40) tras di e Anker grandi na entrada di Sero Colorado. Pa nan suerte of mala suerte a topa cu un bulto, cu aunke nan no sa kico e tabata contene, a lastra hinc den nan auto. No a habri e bulto aki mesora sino algun dia despues.

Segun Dennis a conta, ora cu a habri un di e pakinan berde, esaki tabata contene algo blanco. Pero prome cu esey, el a hura cu e no a pensa cu por tabata trata di droga. Pakico el a coy e bulto bay cu ne toch, e no por a bisa cu solamente "diablo a domina mi".

El a keda insisti cu e no a gana placa cu e droga y solamente e tabatin esaki den su poder. "Mi kier a djis deshaci di e droga," el a bisa pero no por a splica di con e no a yama autoridadnan.

Den e dossier ta para cu a hinc droga den sakito y a "duna": hende, entre otro un tal Vanessa. Sinembargo tin mensahenan di whatsapp unda ta papia den codigo y esaki ta parce benta di algo cu lo ta ilegal. Pasobra no ta menciona kico e ta. Hecho ta e principal acusado ta bisa cu el a duna Schmidt 10 kilo pa e bende p'e. E cifranan no tabata cuadra mucho of tabata parce cu un a horta otro, entre nan e pareha di Stamper.

E pareha ta bisa cu tabatin solamente 5 paki a keda niun hende a splica kico a pasa cu e resto.

Vrolijk a declara cu De La Rosa a pidi'e busca bende pa 5 paki, pero e prijs cu un hende kier a paga tabata 25 mil florin pa 5 kilo y el a hay'e esey demasiado poco, pasobra e kier a bay biba na Merca. Na final a haya un otro comprado interesa den 3 paki pa 20 mil florin.

Pero si e benta por a tuma luga no por saca afo, pero hecho ta cu droga no a haya na e cas.

Tin diferente declaracion cu a habri un paki so cu a regala. Pero niun hende ta bisa kico a pasa cu tur e resto di e droga. E bendemento of oferta pa paki di un kilo na prijs di baca flaca a hala atencion. Esta di esnan cu a perde e droga aki.

Riba e bulto tabatin un X marca y e doño cu a scucha cu a bende cu un tal Vanessa a cuminsa investiga. Riba un anochi Dennis a bay subi su auto, ora cu cuatro homber a lastra sake y hinc'e den un otro vehiculo. Despues el a declara cu e hombernan aki cu nan cara tapa, a lora un paña na su cara. El a keda asina te ora cu nan a yega Vader Piet.

Cu arma den man, a puntr'e kico a pasa cu e droga y unda e resto ta. Nan a sigur'e cu nan sa cu el a haya droga debi na e bentanan cu el a bin ta haciendo. E ordo tabata e siguiente dia nan mester haya e 10 kilo cu el a bisa nan ta na cas di un persona na Zeewijk. Nan a pone despues lomba pa nan y a bis'e cu e no por bira te ora cu e tende un tiro. Asina di un forma of otro el a logra yega su cas.

Dos dia despues autoridadnan a scap'e di morto. A deten'e a base di un tip ricibi, segun Fiscal a splica den Corte. Tin PV traha cu ta bisa cu Dennis Stamper a haya un bulto di droga na costa y inclusive a duna su number di celular.

Tambe Fiscal a splica cu inicialmente a papia cu ne como testigo, pero ora cu el a cuminsa basha abou, a para e interrogacion y a inicia e proceso pa scuch'e como sospechoso. Den e investigacion a bin haya sa cu e bulto cu el a haya, cual saco el a deshaci di dje banda di Barcadera, tin e mesun marca cu e 19 bultonan cu autoridadnan a confisca e luna ey tambe, esta e letter X.

A base di e diferente declaracionnan, a haya sa e cantidad cu cada uno tabata envolvi den dje. Pero loke sa tambe sigur ta cu un bulto tabata contene 20 paquete di 1 kilo, manera esnan confisca door di autoridadnan. Mirando e rol cu cada un a hunga y e hecho cu tur, cu excepcion di Vrolijk, ta first offender a yega na e siguiente demanda.

Den esaki tambe a tene cuenta cu e castigo cu Hof normalmente ta impone.

Pa Stamper 42 luna di cual 12 luna ta condicional, kitando e tempo cu el a pasa cera caba y 2 año di prueba. E mesun castigo aki a pidi pa su ex pareha. Den e caso di Schmidt a pidi 30 luna di cual 10 luna ta condicional, kitando e tempo cu el a pasa cera caba y 2 año di prueba.

Finalmente pa Vrolijk, a pidi 24 luna di cual 8 luna ta condicional, kita e tempo sinta caba, y 2 año di prueba.

Aki tres siman tin sentencia den e caso aki.

Homber lo a bira malo y sali cay for di auto

ORANJESTAD -- Diasabra atardi algun persona a tuma nota di un auto cu lo a para pa zuid di Divi Phoenix, y un homber lo a bira malo y/of tawata actua straño. E homber lo a baha y cay for di e auto.

Na yegada di polis-

nan nan a tuma nota di e homber, cu a cana direccion lama patras di e matanan. Eynan nan a bin haya sa cu e persona lo ta sufri di epilepsia y lo a bira malo tras di stuur. Mesora a solicita pa un ambulance pa atende cu ne.



ARUBA

Chauffeur burachi a bolter cu su auto

ORANJESTAD -- Dia-bierna den careda di 11'or di anochi habitantenan di Rooi Koochi a tende un zonido basta duro y a bin topa cu un pickup gebolter memey di e caminda den e bocht na Rooi Koochi, me-sora nan a avisa polis.

Polis a yega na e sitio y a bin topa cu un pickup Nissan gebolter, e chauffeur a sali for di e auto y tabata muestra basta bou influencia.

Nan a reconoce e chauffeur aki, como e persona cu un rato prome nan a top'e tras di stuur di e pickup y cu nan a dicidi di kita e yabi di auto for di dje y lage na pia pa motibo cu e tabata bou influencia caba.

Aparentemente e homber aki lo a dicidi di cana bay su cas na Cura Cabay, pasa man pa un yabi di spare y a bay bek, start e pickup pa supuestamente core bay su cas, pero na caminda pa cas e la bolter.

E polisnan a dicidi di

haci un test di alcohol cu ne, e la supla y a resulta cu e la pasa e limite bay cu ta

permiti pa por ta tras di stuur. Mirando su condicion, e polisnan na e sitio a dicidi

di detene y transport'e pa warda di polis na San Nicolas.



Homber sin bida haya den cas

ORANJESTAD -- Diasabra den oranan di mainta polis a bay un adres den Rooiweg, pa un persona cu no ta reacciona. Na yegada polisnan a bin topa cu un hende homber cu no tawata

duna señal di bida.

A notifica esnan con-cerni, manera recherche y tambe Slachtofferhulp. Segun a compronde cu lo ta trata di morto natural. Lo ta trata di un homber di 62 aña.



Pa un desaroyo laboral y progreso personal Enseñansa pa empleo educando y fortificando conocimiento

ORANJESTAD -- Recientemente Enseñansa pa Empleo -EPE- a entrega certificado na e cursistanan cu a logra pasa e curso ofreci di Basiskennis Boekhouden y di Ingles pa Principiante, cu exito.

Enseñansa pa Empleo a bin ta recapacita hopi hende desde 1989 tempo cu e proyecto aki di Gobierno di Aruba a inicia cu e fin di yuda nos hendenan cu a perde trabou den tempo di cierre di LAGO, pa por eherce un otro funcion y haya un otro trabou.

Desde e tempo ey, hopi hende cu tabatin e interes di por sigui crece den e mercado laboral, a bin ta haci uzo di servicionan di EPE mediante e diferente curso-nan cu EPE ta duna. Nos sa di casonan exitoso unda cu personanan cu a cuminsa den limpieza y mantenimiento, a logra bira telefonista y cu mas recapacitacion di EPE, awor tin años trahando como asistente administrativo. E secreto ta pa keda studia pa amplia bo conocimiento pa por sigui crece laboralmente.

EPE ta un instancia di Gobierno reconoci pa su

conocimiento y integridad di cursonan practico ofreci na pueblo di Aruba, na un costo social alcansabel pa mas hopi hende posibel.

Recientemente e cursistanan cu a pasa e curso di Basiskennis Boekhouden -BKB- nivel 1 y 2 cu exito, a ricibi un bunita ceremonia di e instructora Sra. Shareen de Cuba cu pa añanan caba ta e instructora di BKB 1 & 2. Awo, riba peticion popular, instructora de Cuba lo ta ofreciendo e proximo nivel cu ta BKB nivel 3.

Kico ta Basiskennis Boekhouden:

E ta un curso cu ta siña bo con pa maneha administracion di un empresa, duna bo mas conocimiento di accounting como tambe di maneho financiero diario.

Instructora de Cuba cohuntamente cu EPE a haci un yamada na tur e alumno di BKB 2 ultimo y tambe esunnan cu den pasado a pasa e curso aki cu exito, pa sigui amplia su conocimiento cu BKB 3 pa propio reconocimiento na e empresa unda ta labora.

Otro grupo cu a pasa

curso cu exito, tabata pa Ingles pa Principiante. E instructora ta Sra. Eslyne Filiciana kende por cierto tambe ta encarga pa duna e hobennan di Formacion Social -SVT- curso di Ingles. Den e mercado laboral di Aruba ta hopi importante pa tin conocimiento di e idioma aki tambe. Otro idioma cu EPE ta ofrece ta Hulandes y nos propio Papiamentu.

Sra. Filiciana pa añanan largo ta encarga cu e curso di Ingles na EPE y e biaha aki tambe cu hopi entusiasmo y orguyo a entrega na e cursistanan e certificado cu nan a studia y traha duro p'e.

E instructora a transmiti su conseho na tur, pa continua semper cu capacitacion personal y a invita nan pa inscribi pa e proximo nivel di Ingles.

Minister Glenbert Croes ta felicita tur cursista cu nan logro y tambe e team completo di EPE pa nan dedicacion pa recapacitacion di nos hendenan cu ta desea un miho porvenir laboral pa nan mes.

Riba enseñansa i transporte

Komishon sentral a reuní ku Minister van Heydoorn

WILLEMSTAD - Miembronan di Parlamento a bini huntu den un Komishon Sentral pa deliberá ku Minister Sithree van Heydoorn i direktor di sektor di OWCS, representantenan di “Autobusbedrijf Curaçao N.V.” i represent-



antenan relashoná ku transporte eskolar. E deliberashon a tuma lugá djabièrñe 31 di mart. Ta trata aki di un reunion ta un kontinuashon di e reunion di Komishon Sentral ku a inisiá 14 di òktober 2022. Miembronan a hasi pregunta den promé tanda i e invitadonan a pidi tempu pa nan por prepará e kontestanan.

Durante e reunion minister Van Heydoorn, representantenan di “Autobusbedrijf Curaçao N.V.” i representantenan di shofùnan di transporte eskolar a duna kontesta riba e preguntanan ku nan a risibí di Parlamento den promé tanda i despues a tuma i kontestá mesora e preguntanan den di dos tanda.

Liña kòrá den e disertashonnan tabata importansia di e transportadó di e muchanan ku mester yega skol i bai kas bèk. Tin mas aspekto ta hunga un ròl ku solamente buska i hiba alumnonan.

Pa e reunion aki tabatin dos punto di agènda adishonal. E promé punto adishonal a trata remplaso di miembro señor Martines pa señor Brownbill den e komishon di Parlatino “Equidad de Género, Niñez y Juventud”. E di dos punto adishonal tabata un proposishon di biahe relashoná ku IPKO na Hulanda na yùni próksimo i e enkuentro tripartit na Sint Maarten di òktober próksimo.”

Riba rapòrt nulmeting

Minister Van Heydoorn ta reakshoná

WILLEMSTAD - Minister di Enseñansa, Siensia, Kultura i Deporte (ESKD) sr. Sithree van Heydoorn ta reakshoná riba e rapòrt final di Nulmeting di Enseñansa. A publiká e rapòrt final i e reakshon di Ministerio di ESKD ku a manda pa Hulanda.

Den kuadro di e Landspakket Kòrsou mester a hasi un asina yamá nul-

meting pa haña un bista di estado di enseñansa. Inspekshon di Enseñansa di Kòrsou i Hulanda a hasi e nulmeting aki i a publiká resultado den un rapòrt final. Minister di ESKD Sithree van Heydoorn a duna su komentario formal riba e rapòrt final aki den un asina yamá ‘Beleidsreactie’ i a manda esaki pa sekretario di estado sra. A.

van Huffelen.

Den e rapòrt tin vários rekomendashon pa optimalisá enseñansa. Puntonan di atenshon ku e rapòrt ta basá riba dje ta kalidat básiko, konekshon entre enseñansa i merkado laboral i realisashon di un bon konekshon entre e diferente nivelnan di enseñansa. Aparte di e puntonan aki tin vários rekomendashon mas.



Aksidente ku morto

WILLEMSTAD— Sentral di polis a risibí informashon ku riba djadumingu 2 di april lo mester tabatin un aksidente na pista di Ronde Klip durante un evento. Un persona lo tabata gravemente herida. For di un investigashon preliminar a sali na kla ku e víktima a keda transportá pa CMC den un situashon di preokupashon.

Pa 19.47 Sentral di polis a risibí informashon ku e víktima dje aksiden-

te a fayeresé. A identifiká e víktima komo Fabian Christopher Lourens, nasé na Kòrsou 19 di april 1990.

Departamento di Tráfiko i Tim Forénsiko di Kuerpo Polisial Kòrsou ta sigui ku e investigashon den e kaso ariba mensioná.

E aksidente aki no ta ser konsiderá un aksidente di tráfiko debí ku e no a tuma lugá riba kaminda públiko.

Pa entre otro intento di asesinato

A detené hòMBER kolombiano

WILLEMSTAD— Un siudadano riba djasabra a notifiká sentral di polis di un aksidente na altura di Montezumaweg. Segun su splikashon, un otro outo lo mester a dal den su vehíkulo i despues kore bai. Sentral a dirigí un unidat na sitio di e aksidente.

Durante un investigashon na un kas na Kaya

Wladimier ‘Coco’ Balentien, polis a lokalísá e vehíkulo i e shofùr. Despues di un diskushon ku e shofùr el a dreña su vehíkulo i purba manda esaki riba un agente polisial na sivil.

Na e sitio polis a detené e hòMBER sospechoso D.A.G., nasé na Colombia di 23 aña di edat, relashoná ku e aksidente, intento di asesinato i violashon di lei

di arma i droga. A tene un entrada hudisial na kas di e sospechoso. Durante e investigashon a haña i konfiská un kantidat di droga i un arma di kandela.

E sospechoso mester a presentá dilanti un fiskal ouksiliar ku despues di interrogashon a ordená su enkarselamentu pendiente di mas investigashon.

Cyclovía Kids bon bishitá

KRALENDIJK -- Djadumingu 2 di aprel, hopi mucha tabata den e área di Parke Wilhelmina i un parti di Kaya Grandi.

Ta trata di e di dos aktivitat di Cyclovía Kids, kisas ménos hende ku esun promé. Esaki tin di aber

ku e diferente aktivitatnan ku tabatin na e mesun momentu.

Importante ta tabatin hopi mucha i mayor i huntu ku e muchanan, tabata kontentu ku e momentu pa nan dibertí den e área será.



Glenn Thomas meresé rekonoementu

KRALENDIJK -- Konosido yu di Kòrsou, Glenn Thomas, a risibí serka diferente persona rekonoementu pa loke e ta hasi pa Boneiru, spesialmente e fiestanan kultural.

Nos TV, huntu ku pueblo boneriano, a duna

Glenn Thomas un homenaje pa e bon trabou ku e ta hasiendo huntu ku Nos TV pa hopi aña. Nan a gradisié pa su aporte i su kontribushon duná na nan tambe, pa karga e kultura boneriano pe sigui ku e bon trabou.

Elba Mercera di Rin-

co-landa, tambe a entregá Glenn un plaka di mérito. Tur aña Glenn ta bai Hulanda durante e selebrashon di Dia di Rincon. Mirando su aporte ku e ta duna, a dun'é rekonoementu durante e último anochi di Kanto Krioyo 2023.



Grupo Grandinan Bendishoná na Boneiru

KRALENDIJK—Grupo Grandinan Bendishoná, tabata na Boneiru durante fin di siman ku a pasa. Ta trata di un grupo ku ta fundá

na 15 di yanüari 2020 i nan sede ta a Hòfi Fidel Kòrsou. Ta trata di un grupo di Kòrsou i mayoria hende ta 60+. Nan a bini pa keiru na

Boneiru i a bishita e grupo Rekresaroyo 60+ di Tera Kora. Nan a pasa djasabra henter dia huntu te anochi i a pasa masha dushi komb-

ersá i disfrutá di bida. Djasabra atardi, nan a bai partisipá na weganan na Antriol Avanti. Aya nan a hunga e wega Mens Erger Je Niet i

tabata un ambiente tur afò pa e adulto mayónan. Riba potrèt momentu nan tabata na Zòzò Ranch, pa sisti stoma.



CHANGAN WORKFORCE



M201 SEVEN SEATER



\$13,995

M401 ELEVEN SEATER



\$17,995

MS201 DOUBLE CABIN



\$15,995

M401 CARGO



\$14,995

MD201 FLAT BED



\$12,995

M201 CARGO



\$11,995

MD201 COOLING BOX



\$17,995

